

Wednesday, November 5, 2025

Time - 2:30pm - 2:35pm

AKASHVANI AIZAWL

REGIONAL NEWS UNIT

JAIL BREAK

Kumin chhungin Central Jail atangin tang 10 an tlanchhuak tawh a, chung zing a 2 te chu tun thlengin man an la ni lo.

Akashvani News Aizawl thu dawn danin, kumin July ni 11, Zirtawpni zanlaia Aizawl Central Jail atanga tlanchhuak Lianhmingthanga (36), Thingsulthliah Hospital Area, POCSO thubuai nei chu kar khat hnu velah man leh a ni a, a tlanchhuahpui Malsawmdawnga (28), Farkawn, ruihhlo thubuai nei chu vawiin thlengin man a la ni lo thung. Hetihlai hian kumin June ni 15 zan dar 10 vela blanket leh mau hmanga Central Jail bang hungnaa lawn liam, Lalthawmthanga (kum28), Zonuam Veng, Aizawl, ruihhlo thubuai nei pawh tun thlengin man a la ni lo bawk.

Thu dawn danin kumin chhung hian Central Jail atangin mi 10 an tlanchhuak tawh a, heng zinga mi 8 te chu man leh tawh niin, mi 2 man an la ni lo thung a ni. Prison Department-a thawkte chuan jail tang tlan chhuah chhan hi tang vengtu indaih loh vang a nih ber thu sawiin, Mizoram prison manual 2017-ah chuan tang vengtu, jail guarding duty pakhatin mi tang 6 an veng tur a nih laiin, mi pakhatin mi 200 bawr vel a veng thin ang a nih avangin kil tin an veng seng vek thin lo tih an sawi a ni.

Mizoram prison department in a chhinchhiah danin, nimin November ni 4 thleng khan Mizorama lungin hrang hrang 11 ah te mi tang 1,896 an awm a, mipa 1,664, hmeichhia 218 leh an fate mi 14 an ni a, lungin a leng zat aiin tang 673 in an tam zawk a ni. Central Jail Aizawlah tang tam berin mi 480 awmna turah mi 912 an tang a, a leng zat aiin 432 in an tam zawk a ni. District Jail Champhai in dawtin, mi 105 lennaah mi 203 an tang a, a leng zat aiin 98 in an tam a, District Jail Aizawlah mi tang 90 lennaah mi 151 an tang a, a leng zat aiin 61 in an tam a. Central Women Jail, Aizawlah mi 96 lennaah mi 149 an tang a, a leng zat aiin 53 in an tam a. District Jail Lungleiah mi tang 109 lennaah mi 138 an tang a, a leng zat aiin 29 in an tam zawk a ni. Hetihlai hian District Jail Saitualah mi tang pakhatmah an awm lo thung a ni.



KURIAN

Union minister of state for minority affairs, fisheries, animal husbandry and dairying Pu George Kurian chuan Dampa bye-election lo awm tura campaign turin vawiin khan Mizoram a lo thleng a, Lengpui tumhmun atangin Darlung a pan nghal.

Ruahman lawk dan chuan vawiin hian Darlungah vantlang inkhawmah thu a sawi anga, Bawngthah leh South Sabual tlawhin vawiin vek hian Kanghmun, Bawlte, Lungphun, Hreichhuk, West Lungdar, Khawrihnim, Chungtlang, Tuahzawl,

Rulpuihlim leh Reiek kuate a tlawh anga. Zanin hian Aizawl-a Hotel Regency-ah a riak ang.



PTC RECRUITMENT

Akashvani (All India Radio) Aizawl Regional News Unit chuan District hrang hranga thawk tur Part Time Correspondent (PTC) a la dawn.

Akashvani Aizawl Regional News Unit chuan PTC tur hi Aizawl, Hnahthial, Vairengte, Champhai North leh Chawngte ah te a la dawn a, kum 24 atanga kum 50 inkar Graduate tan November ni 14, 2025 thleng dilna thehluh theih a ni.

PTC dilna form hi News Section, Akashvani Aizawl pisa Tuikhuahtlangah lak theih ani a, AIR News Aizawl Facebook page ah download theihin a awm bawk.



HOUSE COLLAPSE

Tukin dar 3:27AM vel khan Lawngtlai Vengpui LIKBK Bethel Biak-In thlang (VC Road) a cheng Pi. Vanlalawii In chu ni zan ruahsur lai khan chimin mi 5 a chim hnan.

Inin a chim hnante lakchhuah vek tawh niin, vanneihthlak tak in ngaihtuahawm lutuk an ni lo. Inin a chim hnante hi Pi Vanlalawii (In neitu), a fanu Lawmi, a fapa Jonathana, Dingi leh Pahunga a u fate an ni. In chim hi chhawng hnih a ni a, inchungah hian pathum riak in, inhnuai ah hian pahnih an riak bawk a. In chimah hian document pawimawh senghawi hmasak ngai a awm a VC leh YLA hruaitu ten a senghawi hna an thawk a. Khawtlang huap (a nawlpui) hnattlang hi tukin dar 9:00 atang khan thawh tan a ni.



SEC

Lai Autonomous District Council (LADC) member 25 thlanna lo awm tur atan a inbuatsaihna kal zelah nimin khan State Election Commissioner Dr. H. Lalthlanglana chuan Govt. Rulkual Middle School Polling Station- a tlawh.

Pu H. Lalthlanglana hi State Election Commission (SEC) Deputy Secretary Pu Vanlalchhuanawma Chhawngthu, Election Officer Pu Collin Hlychho leh SDPO Pu HS. Lalmuanpuia ten an tawiawm a. Pu H. Lalthlanglana, chuan inthlanna fel fai, thianghlim leh hlawhtling tak nei turin Election Official- ten theihtawp an chhuah mek zel tih tarlangin, SEC pawh an inpeih thawkhat tawh hle a ti a. Mipuiten zalen taka an aiawh an thlan ngei theihna tur a hmalak zel a ni tiin, chak taka hnathawh zel a ni ang a ti. Commissioner chuan inthlanna tur a Polling Station-mamawh leh awm turte tha tak a peihfel a nih tur thu a tarlang a. Ralmuang taka inthlan a nih theih nan a theihtawp chhuahpui turin khawtlang hruaituten a sawm nghal bawk.

Govt. Rulkual Middle School Polling Station - ah hian vote nei mipa - 181, hmeichhia - 189, avaiin vote nei mi 370 an awm a ni. LADC huamchhungah hian

Polling Station 111 leh Auxiliary polling station 1 awmin, Returning Officer- 3, Asst. Returning Officer- 3, Sector Officer - 17 an awm a. Vote nei zawng zawng hi mi - 56,857 an awm mek a ni. Tuna LADC ding lai mek 11-na term hi December ni 18 khian a tawp dawn a, inthlan hi puan hnaih a nih rin a ni.

